

# Stgafir moda da nozas tipica grischùna

La giuvna dessignadra da raglia Anna Laura Klucker à preschanto la sia colecziùn nova.

DA BARTOLOME TSCHARNER / ANR

■ Usitadameing e la stad betga gest la stagiùn favurida par preschantar moda. Mo par la raglia d'Anna Laura Klucker da Tamegn e gest la stagiùn tgòlda igl tains adato: Da passa egn on annà stgafescha ella cun suzcess surtut raglia da nozas par dunas giuvnas. Dacurt à ella preschanto 16 vastgieus novs a la riva digl Lai da Palpuogna segl Pass d'Alvra. Avànt egn on a miez à Anna Laura Klucker aviart igl sieus atelier da dessignar a cusar raglia speziala a Tamegn. Alura veva ella gest termino igl sieus studi a la Scola òlta d'art a Türitg (ZHdK). L'antscheata matg da quest on à ella preschanto la sia antiera colecziùn a caschùn d'egna mostra da moda agl casti da Rehanau. La sia raglia dessegna, taglia a cusa Anna Laura tuta seza agl sieus luvratori a Tamegn, noua c'ella venda la sia moda sut l'atgna marca cuagl num Yuli.

Quegl fa ella cun suzcess: An que interval à ella stgafieu passa 50 vastgieus a masira, egna grànda prestaziùn. A caschùn da la mostra da moda a Rehanau en quels vagnieus preschantos dad otg fotomodels a radund 160 visitadras a visitaders. Quell'ocurenza, c'ella à organiso seza cuagl sustegn d'egn bùn tozel gidànters, à frunto viv interess. Que evenimaint à gieu igl efect, ca la moda da la sia marca Yuli e davantada ple ancunashainta. «Vurdànd anavos sen que bùn on ca lavur ussa sen mameza, dastg jou gir, ca la mia passiùn par stgafir raglia e betga tschassada», gi Anna Laura. «Jou fetsch fetg bugent igl mieus mastregn.» Mo ella vigni a saconzentrar agl avagnir surtut da stgafir raglia da nozas. «Parquegl ca vez, ca quella e da grànda faszaziùn par me», aschunta ella.

## Raglia c'igl dat me egn'eada

Ad igl e ear samusso, ca la sia raglia da nozas e propi dumandada. «Jou ve survagnieu blears resùns positivs. Las cliaintas apreztgeschan fetg, c'ellas àn la caschùn da cundezider, co igl ragl à da vaser or. Ellas dastgan giavischar, co jou de cumbinar las parts: la blusa cun mongias lüngas near curtas, da diferainta calur, tge decoraziùn c'ella de purtar a blears oters detagls», gi la dessignadra. «Ascheia davainta mintga ragl egn toc individual a persunal c'igl dat me egn'eada.» Egn fatg interessànt par las cliaintas e ear, c'igls vastgieus da nozas d'Anna Laura en fatgs savund egn concezt modular: Quegl munta, c'els cusistan da plir tocs, a las cliaintas pon purtar singulas parts ear ple tard cun cumbinar quellas cun otra raglia. «Ascheia en quels ragls betga me fatgs par egn gi a las purtadras àn la cuida da stger saragurdar adigna puspe da nov digl evenimaint da nozas», punctuescha ella. La mostra da moda à betga me radetg blear'atenziùn, mobagn ear aviart bagn anqual porta par colavuraziùns futuras gest partutgànt la cumpra da telas.

Anna Laura lavura savens cun tulle, gabardina, near danov ear cun seda elastica par far la sia raglia c'ella ornescha cun decoraziùns, par las qualas ella e vagnida ispirada da la viglia tradiziùn grischùna digls petgs an crusch. La raglia da nozas d'Anna Laura Klucker para da plischer a las purtadras. Ella segi amparnevela da purtar a nuncumplitgeada da tractar a lavar. «La lieud à exprimieu d'esser parschadida da la mia lavur. I àn getg c'i apreztgeschan d'aver la pussevleda da savastgir da maniera tant individuala», palainta ella. Quels resùns positivs àn animo Anna Laura betga me da cuntinuar da stgafir novs modelds da raglia da nozas, mobagn ear da preschan-

tar quels da maniera atractiva an las medias sozias.

## Igl dessegn e la sia grànda passiùn

Par far quegl àlla dacurt aranscho egn fototermin spegl Lai da Palpuogna sut igl Pass d'Alvra. Cuagl agid d'egn professionalist à ella fotografo 16 ragls novs an plagna natira. A gea c'ella s'entusiasmescha puspe da la sia activitad: «Jou ve antschie la mia lavur cun schlàntsch cumplagn.» Dantànt malgro igl grànd angaschamaint a la bleara lavur e l'atgna produziùn da raglia finanziaimeing egna dira veia. «Quegl e bagn ampo frustrànd», lascha Anna Laura valer, mo ella vigni a planisar miglier ear la vart mercantila agl avagnir par migliurar la rendita da sieus manaschi, da maniera c'igl salaschi viver da quella lavur a forza parfegn d'angaschar egna cusunza par saver saconzentrar segl dessignar. «Partge igl dessegn e la mia grànda passiùn», cunzeda Anna Laura. Mo dantànt fa ella seza tutas lavurs davent da dessignar, far igls musters, tagliar la tela a cusar la raglia – anqualgea cun agid da la mama Erica. Quànt gitg c'ella stat ved egn ragl salaschi betga gir an general. Quegl varieschi da vastgiu a vastgiu. «Igl blear tains dovr jou da svilupar la raglia, antoca ca ve igls musters par ornar els a cumbino tut», gi Anna Laura. «Igl tains ca jou drov davent da l'idea antoca ve fito egn ragl sa peia varier fetg. Scha ve planiso tut a ve ca tut va sei bagn, alura cuz'igl forza 20–25 uras. Mo scha sto star a midar blear, po'gl cuzar trànter 30 antoca 60 uras par egn ragl.» Gl'amprem vean fatg igl sboz. «Bleas geadas, cur ca ve egn'inspiraziùn, vez egn muster near egn detagl c'interessescha me, alura nescha l'idea. Jou safiguresch alura igl antier ragl, skizesch el cuagl risplei. Tut savund caluresch jou ear igl sboz cun fleters

near rispleis da calur par ampruvàr igl efect digl ragl caluro. Cun agid digl computer dessegn jou alura igls fitamaints.»

## Tut de darivar digl Grischùn

«Igl spezial ve da quels ornamaints e, c'els sabasan sen vigls musters digl petg an crusch grischùn c'jou scumpon an singuls elemaints a cumbinesch seglsuainter a novs musters, ascheia c'i van exactameing a pro cuagl ragl nov. Las masiras vignan ear inditgeadas agl computer c'obtegni egn muster exact. Alura vegn la schelta digl material, vut gir da la tela. Suainter tagl jou igl ragl a aplitesch igl muster», declara la dessignadra igls pass da la sia lavur. «Naturalmeing c'igl dat ear midadas spontanatas, cur ca ve igl dessegn ca funcziùna betga propi an la pratga. Alura e'gl da vurdar, co midar, tge elemaint c'igl e d'eliminar. Da quegl dat igl ear bleas geadas, ca bad, c'igl va betga sco previu, near c'igl muster va betga a pro cun la part digl ragl», cunfida Anna Laura. «Mo ascheia se jou individualisar mintga ragl a mintgegn davainta egn unicat ca la cliainta po ear purtar par otras ocurenzas festivas ad an otras cumbinaziùns. Quegl e impurtànt par me. – Da far raglia da nozas mi faszinescha semplameing. Ad igl sactra da far anzatge spezial par egn gi unic plagn emozziùns.» S'antali ca la lavur a màn à igl sieus prezi. Pigl mumaint custa egn ragl da nozas individualiso da Yuli trànter 2000 a 3000 fràncs, tut tanor vastgiu a giavischs persunals da la clienta ear pli blear. Fuss igl alura betga d'avantatg da far cusar quella raglia agl exteriur, la vainsa dumando. «Na, jou sund da l'idea da salvar l'antiera produziùn agl Grischùn. Quegl s'oda tier la mia marca, ca la raglia e dessigneada e tagliada a masira a fatga agl Grischùn. Jou less sataner ve da quella filosofia, ca tut ca fetsch e individual a fatg

a màn», cunfearma Anna Laura cun parschuasiùn.

## Yuli ear agl avagnir

Partge c'ella completeschi la sia colecziùn betg ear cun vastgadira da nozas par umens, e stada egn'otra amparada. «Igl e semplameing ascheia, ca la vastgadira da nozas feminina porscha blear duple spazi creativ ca la masculina», raspunda Anna Laura. Ella vegi pondero bagn quella dumonda. «Mo a mei ple que tef romantic da la moda feminina, cun la quala ign po giujear. Da far raglia par las dunas porscha semplameing duple spazi a la fantaseia, duple pussevledas da luvrar cun decoraziùns», concluda Anna Laura. Pigls spus à ella dantànt antschie a far tschitas decoradas cuagl madems fitamaints sco sen la rassa da las spusas. Evidaint ca la sia raglia da nozas à dantànt cato egn vast tscheacal d'amateurs. Ascheia e Klucker vagnida anvidada da preschantar la sia raglia da nozas a caschùn digls «Laax Vintage Days» agl Rocks Resort c'àn liac igls 24/25 d'avust. Alura fa ella egn gi da las portas aviartas an sieus atelier a Tamegn. Igl 31 d'avust, da las 14.00 antoca las 16.00 pon ign prender anvesta a la lavur d'Anna Laura Klucker agl sieus atelier a vurdar là raglia da nozas. «La mia fegnamira e'gl an mintga cass da cuntinuar cun la mia marca Yuli cun saconzentrar sen la vastgadira da nozas. Dasperas sund jou sadezidida da far igl studi da master a la ZHdK. Quel vean a cuzar dus ons. – Igl mieus siemi e bagn quel d'alura saver viver digl dessignar raglia», Klucker c'e tant egn dessignadra sco ear fotografa dunada.

**Duple infurmaziùns dat igl sen la pagina [www.yuli.ch](http://www.yuli.ch), noua c'ign po ear vurdar igl film davart la mostra da moda agl casti da Rehanau.**



La spusa, vastgida cuagl ragl da nozas «Alea» d'Anna Laura Klucker, cumpara sco egn ànghel agl sulegl da la sera spegl Lai da Palpuogna.

FOTO A. KLUCKER



Betga mains angelica cumpara la spusa agl vastgiu «Livia» cun sieus fitamaint agl stil digl petg an crusch grischùn.



La scena finala da la mostra da moda agl casti da Rehanau cun la dessignadra Anna Laura Klucker amiez igl ravugl da las preschantadras.



La dessignadra Anna Laura Klucker da Tamegn ca stgafescha raglia da nozas individuala cun la sia marca Yuli.

FOTOS MAD